

珊瑚舌雕談初筆

珊瑚舌雕談初筆卷五目錄

聖崇理學

蘭亭修禊

在晉書卷五

過午不飲食

韓子貞死事略

附記預兆

鐵樹

印臂

堂子

冥召

書遮目

壓虎子

附錄勒示

粥隱

子平

杞油

藥名詩

關帝祖考諱并誕日

別體字

大荒捏熟

卽且甘帶

火靈庫

梁山伯祝英臺

守雌辨

徐小犬

南唐硯滴

沈石田化鬚疏

刼夢

珊瑚舌雕談初筆卷五

長洲 許起

香齋

甫里 王韜 无晦 栞

聖崇理學

聖祖仁皇帝夙好程朱深談性理所著幾暇餘編其
窮理盡性處雖夙儒耆學莫能窺測所任李文貞光
地湯文正斌等皆性理耆儒嘗出理學真偽論以試
詞林又刊定性理大全朱子全書等書特命朱子配
祠十哲之列故我朝宋學昌明世多純儒耆學風

俗醕厚迴非前代所能及也

蘭亭修禊人名冊子

蘭亭會四十一人當日流觴賦詩成二篇者王羲之
王凝之孫統謝安孫綽王宿之王彬之徐豐之謝萬
袁嶠之共十人成一篇者魏滂郗曇桓偉虞友王渙
之曹茂之庾薏虞說王元之謝繹曹華王蘊之華茂
孫嗣王豐之共十五人詩不成者謝勝謝瑰邱旄任
凝王獻之楊模后綿呂系孔盛鐫密勞夷華胥卞迪
呂本曹謹虞谷共十六人晉穆帝永和九年暮春王

右軍序并書陳天嘉中智永得之授弟子辯才唐太宗令蕭翼取之後從葬昭陵此一則董香光書於涿榻蘭亭帖後尾有翁覃谿跋語數行余於道光丙午以空青白瑪瑙小印一漢建初銅尺一與潘暘谷茂才裕容易得之時時臨摹愛逾珍貝副葉鈐以茶香書畫樓珍藏印皮諸行篋無一日不展玩不意赭寇擾攘之際忽來周莊鎮槍匪於壬戌七月廿二日晨大肆劫掠余適從海上以省墓歸才至二日輒丁此厄一切服飾殊不足惜惟此冊子抱恨無涯未識尙

在人閒流落何人手中茲特背書一則尙冀獲帖之士憐余之情寄賜一觀俾余此生再見以銷失後耿耿之私不知尙有此翰墨因緣否也

過午不飲食

余於道光末紀與施小韓上舍燾入郡偕訪顧椒園先生達遂游鄧尉天平諸勝處旋於支硎山中見一老翁容顏矍鑠步履迅捷惟鬚髮皤然問其年已百有三歲矣遂至其家小憩始悉翁係淞藉少時贅于吳門後入此山三十餘年灌園爲業頗好吟詠因詢

其何術致此強健答曰至五十歲後不覺晨餐漸旺
午後則不飢亦不渴今至日午口不納一物餘皆無
異於人并背誦閒居舊作有身如黃犢健心比白鷗
閒之句翁姓汪名野字孤序後屢欲再訪惜不果

韓子貞死事略

增記預兆

韓子貞爲蒲江令清而勤甚得民心一日賊劫犍爲
鹽課兵役捕之急遂竄蒲江蒲江瘠邑賊素所不至
子貞聞賊入境出城號召團民奔馳二十里遽與賊
遇顧從役皆散計惟下輿開導如單騎見虜故事甫

停輿羣賊蠭擁至遂遇害賊見團民漸集遠颺他境
先是子貞署中廳事每夜深更聞有捲軸聲霍霍然
自下至上忽礮然一聲從上墮下軸木至地如碌礪
滾至窗限聲爲頓止少頃則又作竟夜不絕明日眎
之所懸書畫宛然如故如是者月餘一夕子貞在內
廳事獨坐壁間挂一篝鐙鐙光如豆忽見中庭一物
從階下湧起如田家柴積上有千萬隻眼睛光閃爍
射目目難審眎其行頗捷心甚驚急呼人有幕友嚴
純甫茂才亦吾里人也跟踉趨出略見其背不旬日

卽罹此難嚴旋歸里亦遇粵寇不知所終有識者曰
捲軸聲是鼓妖也眼則不詳其名以俟博雅君子子
貞姓韓名一松祖居甫里考宛平籍登乙巳進士性
狷介寡交好一介不輕取與與余先後同出顧滌盦
師門下故知之甚詳又憶子貞曾於春闈揭曉前一
夕夢涉石梁甚高聳至頂再欲往前則竝無一級惟
一派汪洋前程浩淼而已遂驚寤假歸省墓時親與
余言余曰宦海中豈無寶筏自能誕登彼岸孰知竟
乏波羅蜜也哉

鐵樹

周禮不食卷五

四

選更手校本

鐵樹高不過數尺葉紫黑色形如石楠略似老少年
花開四瓣如桂而不香累月不凋產自南海余於外
戚家見之時值丁卯歲有云此樹花開必遇甲子故
有鐵樹開花之諺言難遇也然一紀未遇人叅樹萎
吁可慨已按王濟兩舟所記云官橫州於一指揮家
圃中親見此樹厯言其六十年開花之詳在羊城學
使署亦見鐵樹高大不殊諸樹但以鐵屑培護其根
則茂非若他樹以水澆灌者也則又與余之所見者

有異

印臀

樵李懷韻甫別駕佩文與余言外省妖術頗多曾於山東博興縣游幕時一日見令杖一囚囚通異術杖皆着其臀內夫人之體痛楚弗勝令急止杖商於余余命以縣印蘸硃油印囚臀腿杖之然杖或着於印外則夫人下體猶痛於是密疊印之毫無空隙術遂不行因斃杖下余曰君以爲不能移杖於令猶畏王法故假印以壓之歟韻甫曰正能克邪凡事皆然

堂子

顏甫自幼入京稍壯卽廁英煦齋協揆幕中辦事故頗悉都中瑣事嘗謂余曰堂子蓋滿洲舊俗祭天神祭佛之所出師則祭大纛圍殿神曰紐歡台吉武篤本貝勒樂用三絃琵琶節以拍板掌祝擎神刀唱神歌眾唱鄂囉囉相和東南神亭則祭尙錫之神卽田苗神也每月朔內管領一人免冠去外褂解帶入跪叩祝東南建上神殿南向爲祀明將鄧子龍位蓋子龍與太祖有舊誼故附祀之歲正朔上

率宗室王公滿一品文武官詣堂子行拜 天
禮俗傳以爲祀明劉將軍挺其以此而誤乎言出情
理之外不意士大夫亦有信其說者吁可怪已

冥召

新陽食餽生陳選青志光學瞻才高潔廉自守君子
人也然逢曲學輩輒憎鄙陋未免以傲睨臨之因是
家鄉下士咸畏忌焉其師陸心齋孝廉溶余之外戚
也與余素善時余兩兒方擇師特荐選青遂館余家
從游八載賓主如一日旋以余二子學業輟就去客

郡中三四載間交游頗廣後應香山鄭陶齋觀察官
應聘至海上織布機器局司理筆札臨行特來告別
剪燭談詩開尊話舊款畱信宿而去幕中皆當世知
名士談論浹洽清明節同幕二三友邀偕踏青日晡
而歸身覺疲憊遂得疾寓書於余詳述病狀余輒勸
其歸里四月杪返櫂命舟見訪下榻小齋欲往郡中
鐵佛寺養疴余觀其神氣索然早識是病難瘳卽遣
大兒陪奉入郡至寺寺中長老余舊友也妥爲安頓
一夕長老夢一顯者來謁客客卽陳先生也顯者服

色非 皇朝冠帶言次陳幣聘請遂潛詢從者貴官
自何地來從者曰本邑也寤而思之疑爲冥官因先
生病諱不言至六月朔夜半先生夢一皁衣人手託
一槃槃中具紅綢并述柬明日遂興長缺之思辭謝
長老長老曰居士不以岑寂爲嫌盍至秋涼而返老
衲深恐觸此毒暑無益於清恙陳曰辱蒙上人雅誼
銘感不朽然上人有所未知余恐不久人世矣因述
霄夢匪禎長老曰速者似非初次相請曩曾有夢乎
曰有長老曰非於某夜顯者親造乎曰上人豈同入

夢境乎夢中與從者言尙能記否長老笑曰然則居士當知其所在矣曰吳邑也兩相驚愕歸家僅三日溘然長逝時辛巳六月初十日也於戲選青具此才學識見年富力強意其將來必大有爲孰知天奪其算命耶運耶雖然誰能不死惟生而無過乃見召於冥中人之死必有愈於生者不然彼神姦巨猾往往得以壽考幾疑造物之或爽矣

書遮目

勒悟九方伯每出肩輿中必攜書一本觀之不置有

友問曰公何好學乃爾曰非也百姓見地方官必起立余曾見有廢工而興者有帶病不勝而作者於心不安故藉此一卷書聊遮我目耳

壓虎子

增錄勸示

壓虎子一名押火豬又名阿呼紙左道邪術也光緒丙子二年春聞吾郡漸佈剪辮之謠至三四月各鄉鎮咸有此患吾家西鄰有一七八歲女子素扮男裝一日偶立門前徒倚入室則髮辮已剪去尖梢六七寸矣當時相傳必再自翦去少許置厠桶下則已翦

之辯卽能來還其母如法爲之果驗五六月閒又聞各處軍營中夜相驚不敢安睡帳中來時不拘醒睡有一物壓胸不能輾轉呼吸氣悶欲絕如夢魘狀有須有人知覺急切破法如鳴金持糞帚穢器呼救乃醒遲則竟至氣絕而死秋初吾里及郡中各鄉村至夜鑼聲爆竹驚喊徹旦不絕於耳里之南隅陳家濱有一馬姓少婦新產後被壓殞命餘多救甦又周姓家拾得兩紙人於門縫中有人往往於黑暗中見如流星螢火焰焰然飛入人家窗櫺則其家必有驚怪

又聞無錫人述及北門外王姓家夫婦因暑分榻卧
一夕夫聞妻寐中氣喘帳鉤鳴聲震厲急取火揭帳
觀之見婦仰卧流涎有男子赤身伏其上乃迅取押
牀棍向男子揮擊詎知棍落而男倏滅僅遺紙人一
枚長止三寸許其妻則兩肋轉受棍傷後赴蘇就醫
又有望亭鎮杪陸姓婦晚間在場外與鄰女乘涼見
有小犬三頭入其門初不爲異迨婦閉戶登牀猛有
一犬踞於枕畔張牙欲噬婦驚舉手欲擊犬頓長大
如牛婦欲逃而門首更立一犬旁皇無措幸日閒安

排鑪蓋急取亂敲呼救鄰人聞聲彼此往眎則見犬
首大如車輪露牙伸舌塞於門戶眾不敢近相率鳴
鑼而已婦逼甚將杙毀牀後壁踰垣而出相特竟夜
天曉始寂尋其迹惟紙犬三張耳此外有如黑狸黃
狼白鼠煙毬火劍冰檠玉蜈蚣金蠓蠖之異不一而
足種種奇怪難以枚舉相傳須用黃紙硃書天蓬呪
粘於房門及帳額爲禳後至九十月妖風漸熄先是
天中節有一閒人見一老者率童子三四輩於冷僻
所試放紙人岸旁泊一漁船遂糾伴獲老擁報吳令

高伯足心夔令卽審問老者但云偶爾遊戲令命當
堂試之老者口中默念數語紙人遂於堂上騰空盤
旋棟梁間隨手一招紙人輒下視之則與尋常紙剪
成者無異爰卽收禁旋聞爲教會中人強索去未知
所終於時勒悟九廉訪出示勸諭埒錄于左

欽命江南江蘇等處提刑按察使司總理驛務勒
示爲閭切勸諭事照得左道必誅著明法令近日
訛言四起謂有邪匪翦人髮辮甚至以夢魘相驚
其中倘百有一眞此等妖人豈復可少寬刑典本

司謬爲臬使不能使異端懾伏貽累我民皆由忠
信未孚智能太淺返躬循問殊媿素心惟是平生
疾惡如讎斷不姑息匪徒使善良蒙害顧有念下
民之孽非降白天人無釁焉妖不自作今農功正
亟勞苦倍常何堪在處喧囂昏夜不能休息彼邪
匪行同鬼蜮正欲使羣情惶怖乃能乘隙爲姦爾
眾民若望影生疑聰風失措憑虛構妄是自墮其
術中也爲此亟行曉示一應軍民人等知悉大凡
人心克正陰慝難干恐婦孺村氓未明此理所賴

矜耆儒士詳明解釋切戒其躁擾紛紜事定人安
謠言自釋卽或有外來醜類無從溷跡潛身偵緝
到官自可訊明嚴辨願勿以此語爲迂也切切特
示

韜塤注此論頗能以正理自持不愧爲讀書官
中丞有令子曰元俠於詩文能自成一家言

粥隱

葑谿姜夢璜礪高士也終歲食粥隱於陋巷歌聲時
出闌闔中與潘芝軒相國素善相國旣貴未嘗一千
之郡中有士人入都親朋咸屬以書貽相國不得已
付以一函相國啟緘祇詩二絕其一云十緡買得茅

柴屋野趣吟來恐不勝君若閒將鄉味憶門前新熟
水紅菱其二云兩逢儉歲窘吾鄉人面都如菜葉黃
秋雨幸堪彌夏旱涼風吹送稻花香相國得詩憐其
貧致書守土者令周之縣令欲代爲置產親造其廬
而高士閉戶不納傳語必欲相見則我汶上去矣後
年至九十無病而卒當時有人問其何以終年啜粥
之故以爲人之所以食者飢也粥已可免何求於飽
苟逢凶歲反覺自然耳

子平

今之祿命家言子平者其說始於唐殿中侍御史李
虛中虛中後以服水銀疽發背而死不知其曾自推
算否

杞油

枸杞子榨油點燈觀書能益目力出焦氏筆乘若今
之煤油燈不可觀書比花核油尤爲傷目

藥名詩

詩有句中暗用藥名以及曲牌郡縣花草等名卽不
牽強終覺小巧傷雅然非心思明敏斷不能作茲偶

摘元陳高藥名詩五絕一首云丈夫懷遠志兒女苦
參商過海防風浪何當歸故鄉可謂盡美矣而猶未
盡善也如宋戴昺山家小憩卽景效藥名體五律一
首云柴門通草徑茅屋菟絲攀修竹連喬木高松續
斷山仰空青蔭密埽石綠花斑傍澗牽牛飲白頭翁
自閒筆致嫻雅不覺湊合末聯尤屬天衣無縫不可
多得余亦曾效顰因一藥買驟獲利市三倍輸貲買
官旣之滇南有一老母在家忽被盜窘於衣食於是
丐余作札欲令其子告養言歸乃戲書一絕云奉檄

向天南何當歸旨甘甯知母老病獨活計難堪

關帝祖考諱并誕日

關聖帝君久載祀典順治元年詔建廟歲以五月十三日遣官致祭雍正三年令天下郡縣春秋祀神以太牢又追封曾祖光昭公祖裕昌公父成忠公竝立木主神扶翊景運代有褒崇順治九年先封號曰忠義神武乾隆三十一年加號靈佑嘉慶十八年逆匪犯闕突見神像戰慄就殄次年加號仁勇道光七年敕定西陲加號威顯咸豐二年奏報以神佑克守省

垣加號獲國後國子監司業奏請申明樂用六成舞
用六佾定爲三跪九叩禮晉封加號文武神聖先於
嘉慶八年邵伯鎮人仇岡錄錢塘馮景聖帝碑記刊
於壁茲摘其記曰康熙十七年戊午解州有常平士
子于昌者讀書塔廟塔廟聖故居也昌晝寢夢聖授
以昌碑二大字驚而寤見溶井者得巨甌碎之甌上
有字昌急合讀乃紀聖之祖考兩世諱字生平大略
循山而求得墓道焉遂奔告解州守王朱旦朱旦作
關聖祖墓碑記記中載聖祖石盤公諱審字問之和

帝永元二年庚寅生居解州常平村寶池里冲穆好
道以易春秋訓其子卒於桓帝永壽三年丁酉享年
六十八歲子諱毅字道遠性至孝父沒廬墓三年旣
免喪於桓帝延熹三年庚子六月二十四日生聖聖
長娶胡氏於靈帝光和元年戊午五月十三日生子
平云云今天下俱以五月十三日爲聖誕由於順治
初建廟遣祭日傳訛習俗已久毋庸更正想必當時
竝不知聖子平之誕亦適符此日耳

別體字

雕談初筆卷五

古

遯叟手校本

魏書劉芳傳高祖遷雒路由朝歌見殷比干墓愴然
悼懷爲文以弔之芳爲注解表上之卽此文也此碑
字多別構如蓂爲薨蔽爲薺菊爲藥寔爲窹箕子爲
箕子往爲住厥爲厥遭爲亶顛爲顛辛爲亲因爲曰
桴爲枰翺爲翺曳爲电芙蓉爲扶容葩爲葩漂搖爲
灑颺慮爲慮螭爲螭裔爲裊帶爲帶訴爲訴雛爲雛
瀏爲瀏俯爲府闔爲闔騶虞爲騶驥隨爲隨轡爲轡
吸爲歛闕爲闕睇爲睇不可勝紀北朝喪亂之餘書
迹鄙陋加以專輒造字猥拙甚於江南乃以百念爲

憂言反爲變不用爲罷追來爲歸更生爲蘇先人爲
老如此非一徧滿經傳如追來爲歸見穆子容太公
碑作跡先人爲老見張猛龍碑作尅更生爲蘇今猶
用之作甦余不解邇來士夫競相效尤滿紙筆畫非
隸非篆絕無晉唐楷法以爲不宗北魏大失時蹊而
不知世局攸關居上游者當亟力挽此風可漠視之
乎

大荒捏熟

松郡於乾隆二十八年七月二十七至二十九連日

暴風禾偃花落旋又天氣鬱蒸不雲而雷於是四鄉
田有全荒者有及半者有畝收一二斗者姦佃藉口
歲凶粒米不償田主相顧浩歎而已乃巡撫洪之傑
不以入告反覓取句容縣青苗一束繪嘉禾圖上獻
可稱妄且狠也余在髫髻時每值秋有風暴先大父
櫟山公必言及之并背誦當時盧元昌有詩志慨曰
困窮甘儉食垂老遇奇荒百歲人稀邁三吳事可傷
採丸竟白日肱篋到黃堂時府公被劫我粟無升斗開門
亦不妨

卽且甘帶

金子柔鎔余同門士也工書玉版十三行頗善小詩
形質樸鈍性情旖旎惜早世所著不傳當日讀書於
天風草堂見庭中假山之側一蛇蜿蜒出游忽有蜈
蚣躍出至蛇尾循脊而前及首蛇遂僵卧不動蜈蚣
以左右鬚入蛇兩鼻孔久之而出蜈蚣旣去蛇已死
矣正疑訪聞余適至子柔卽指殭蛇以問余曰子何
忘卻莊子云卽且甘帶乎卽且蜈蚣也帶蛇也甘之
之義卽監其顓也子柔又問其所以然余曰物各有

制如蜈蚣過蝸篆卽不能行海東青鷺鳥也而獨畏燕象猛獸也而獨畏鼠其理亦然

火靈庫

韓昌黎表諫佛骨矣潮陽一貶瀕死不悔其志甚堅晚乃與佛子大顛游又作李干墓志厯序以服食敗者數人爲世戒其智甚聰而晚年頗親脂粉故事服食用硫黃末攪糯米煮飯啖公雞不使交逮盈千日始付庖人烹之名火靈庫聞日進一頭卒至殞命是所謂笑前車之覆轍而疾鞭以迫其後也昌黎猶且

如此何況今之士夫於鴉片煙始疾如讎誓死不吸
轉瞬閒愛之若性命哉

梁山伯祝英臺

吾吳春暮園中花蝴蝶甚眾另有一種狀似蜻蜓六
足四翼軟弱不禁風力一種身翼俱黑色光閃金碧
其態尤屬嬌怯更有一種元翼元足黑白花身身較
肥此卽陸天隨所謂蠶化也多蛻於橘樹上婦孺咸
以爲當日梁山伯祝英臺生死相感如韓憑夫婦精
魂幻變者故以名呼之梁祝事自幼聞之疑其無稽

不之道也近覽甯波志梁祝皆東晉人梁家會稽祝
家上虞嘗同學祝先歸梁後過上虞尋訪之始知爲
女郎歸告父母欲娶之而祝已許馬氏子矣梁悵然
若有所失後三年梁爲鄞令病死遺言葬清道山下
又明年祝適馬氏過其處風濤大作舟不能進祝乃
造梁塚失聲哀慟忽地裂祝投而死焉馬氏聞其事
於朝丞相謝安封爲義婦和帝時梁復顯靈異有勞
於國封爲義忠有司立廟於鄞云又見顧阿瑛秋興
十絕有句云聞身得似梁山伯日日玉簪花上飛

守雌辨

辛酉歲避兵滬上一日譙集也是園席有一客高談
雄辯自負不凡以爲暫時變屈甘守其雌余應之曰
老子所云知其雄守其雌知其白守其黑知其榮守
其辱若不能雄而但守雌不能白而但守黑不能榮
而但守辱則老子乃一無識無用之人矣唯能雄而
不爲雄能白而不爲白能榮而不爲榮然後爲老子
之妙用也座首馮林一中允聞余之言特起立向余
拱手稱善足徵前輩誘掖之雅

徐小犬

吳子華詩百篇李洞但取暖漾魚遣子晴游鹿引麋
一聯杜荀鶴詩三百首時人但取風暖鳥聲碎日高
花影重一聯至若邵文敬之半江崔珣之鴛鴦鄭谷
之鷓鴣賀昉之梅子謝無逸之蝴蝶鮑當時之孤雁
袁景文之白燕杜庠之赤壁皆以一題成名者嘉道
閒有徐嬾雲吳江名士也與余太老師顧穎箬孝廉
昀爲莫逆友其鬻田詩云從今謝卻催租吏小犬花
陰自在眠時人戲目爲徐小犬此可與祁蛙鼓梅河

豚俱稱雅諱

南唐硯滴

余寓居海上時馮總戎命弁士持柬具幣招余至其
巨艦艦泊於天妃廟前將登艦已有三四都司肅迎
入艙供茶點甚腆繼入診其愛姬病出書方藥左右
具筆研見金銅蟾蜍硯滴一枚重厚奇古磨滅處金
色愈明非近世塗金比也卽詢諸都司輩有一靳姓
者曰此南唐故物也卽舉以傾去水置於余前曰請
先生詳加賞鑒乃得摩挲細閱腹下有篆銘云捨月

窟在左足心伏斐几右足心爲我用左後足貯清泚
右後足端溪石澄心紙在額下左右各三字陳玄氏
毛錐子在腹之兩旁各三字同列無譁聽驅使微音
潤澤烏用汝在腹下兩旁各七字當玩之際愛難釋
手未識今尙無恙否也

沈石田化鬚疏

化鬚疏有序云茲因趙鳴玉髡然無鬚姚存道爲之
告助於周宗道者於其兩腮之間分取十鬣補諸不
足請沈啟南作疏以勸之疏曰伏以天闥之有刺地

角之不毛鬚需同音今其可索有無以義古所相通
非妄意以干迺因人而舉康樂著舍施之迹崔諶傳
插種之方惟小子十莖之敢分豈先生一毛之不拔
推有餘以補也宗道廣及物之仁乞諸鄰而與之存
道有成人之美使離離綠坡而飾我當楫楫擊地以
拜君把鏡生歡頓覺風標之異臨流照影便看相貌
之全未容輕拂於染藝豈敢易撚於覓句感矣荷矣
珍之重之敬疏案石田翁不僅畫掩其詩而其文亦
有絕佳者卽如此疏用事妥切鑄詞深古字字皆有

來處卽古人集中亦不可多得何況近今後進好輕
詆前輩動輒高談史漢亦可嗤已

劫夢

妹倩陸鑑民文照新陽名諸生也鄉闈屢薦嘗於報
罷後佗僚無聊獨自出游遇雨闖入枯廟闌無人焉
坐於神前蒲墩恍惚有二豎子來拘其手足又來蜈
蚣二十餘皆長四五尺許叢集簇擁身與二豎俱出
廟門自覺魂已離體至一處絕無城市村落迴非人
境飄飄忽忽竟與二豎入一石瓮中僅有一二三蜈蚣

踞瓮口瓮若空懸力曳之瓮可動而身不得出無何
忽飛一鷹來銜食集瓮口似欲哺意不納則若強之
每飛至蜈蚣絕蹟旋又有一猴躍入瓮內喁喁然有
語語不能解左手持一鐵椎右手執一鐵鑿示以鑿
瓮勢如法試之甫舉手錚錚有聲蜈蚣無數來適值
鷹至啄殺幾頭餘皆竄失砉然一響聲震山谷而石
瓮竟破無如二豎併力扼要害處悶極氣垂絕遽然
而覺買櫝過余述此夢兆求爲代解謂必不祥余偶
言之於故人熊蘇林蘇翁喟然曰此劫夢耳不第今

日我不敢言恐刼到時我不及見子必見之渠因子似有一綫生路然以數論斷不能挽回也蘇翁旋果謝世庚申歲赭寇橫行蘇垣淪陷城外鄉鎮俱遭焚掠錦谿以早有僞鄉官得無犯壬戌重陽有樵李巨隊賊匪蜂至錦谿一鎮大爲蹂躪燬屋擄人鑑民亦與此難先是鑑民避氛於澉河濱以太夫人疾篤不得已奉母歸甫三日鑑民亦患瘡在牀於時余適從滬城潛回欲邀鑑民移寓申江舟抵錦谿已晚內叔陸介甫文學雲澹堅邀視脈議方甫畢陡聞寇警力

趣解纜僅攜八齡內阮於舟舟子駕櫂如飛得出虎
口行三里許命舟子登岸回探遙見賊勢甚張不得
前越二日得悉鑑民爲寇擄去自此一去永隔幽明
哀哉是歲冬杪始有同日被擄時生者從嘉禾賊巢
逸出藉悉顛末據時生云陸先生擄去不食覓死有
僞王翁姓者待之極優撫慰再四而先生輒大聲肆
罵惟冀速死翁賊終不怒務欲其從遣賊卒監之繼
忽來孫姓應姓兩人俱屬閩產皆庠序中人也同於
春閒脅從佯受僞職與先生附耳言自此先生稍進

糜粥半月後漸能行然瘡仍作翁賊以先生既肯食
又不罵以爲從己無所疑不料先生一夕持刃刺殺
翁賊賊館大亂眾各竄逸先生呼小子曰與汝偕去
出城行不半里得晤孫應兩人相與其投田家借宿
方知翁賊之死先生受孫應之計也明日先生瘡復
大作昏厥瀕死遂囑小子回里寄語家人於焉永訣
既逝覓得舊棺瘞於田家屋後隙地方謀具祭忽隱
聞礮聲俄而又聞甲馬洶洶聲懼別路賊來各散小
子得歸故里幸賴先生之忠勇而又深痛先生之不

克同歸也余聞時生言不禁淚涔涔下回憶舊時劫
夢應之歷歷不爽抑亦奇已雖然鑑民抱經濟奇才
世不一用而臨難則大具肝膽爲國殲逆豈非由於
平日讀書養氣之功哉推此志也可與日月爭光矣

珊瑚舌雕談初筆卷五終

珊瑚舌雕談初筆卷六目錄

天縱善算

秦觀妙句

偏見

反切

書家祖師

浦珠兒

尾大不掉

糟可療目

命同人異

婦有七出三不去者

鹿尾

王廣文異夢

方軍門將才

羅浮蜚繭

屏盜賊呪

三焦

搭截題

戚孀子

簞夢

畫貓辟鼠

古詩平仄

屐

喪丐

釣臺絕唱

畫家三要

姚桂

生造日

荆釵傳奇

銀蓮金羸

洛成

陽湖婦訣別詩

釋鱣有子

除巨猾

珊瑚舌雕談初筆卷六

長洲 許起 壬瓠 著

甫里 王韜 紫衲 槩

天縱善算

自明中葉泰西人入中國雖知其算法天文精於中
土而中土因大統法係我祖文正公魯齋先生所定
故終扼其說不行

聖祖仁皇帝天縱聰明夙

習天算特命靈臺皆以西法爲主惟置閏用中法以
合堯典千年錯失定於一旦然後乾象昭明千歲可

坐而定乃知 聖人御世故天預令西法傳入中
土俾得因之懸象布命億萬年之景運固先兆於是
矣

秦觀妙句

恩竹樵方伯錫嘗言少游五言詩中有雨砌墮危芳
風軒納飛絮六朝佳句也張少渠大令豫立爲余述
之聞之殊深欽佩

偏見

有一冬烘先生特地過訪聆其語言拉雜忘評時哲

以爲今人意見之偏所以不能入賢人之域余曰否
否不然人之賢與不賢正無關意見之偏不偏也曰
古之賢者有偏見乎余曰偏莫甚於古人茲略舉幾
人以質如楊大年不喜杜工部詩目爲村夫子王半
山不喜春秋目爲斷爛朝報蘇東坡不喜韓昌黎畫
記目爲甲乙帳簿劉須溪謂詩至文選爲一厄米元
章謂顏真卿筆頭如蒸餅大醜惡可厭司馬溫公不
喜孟子諸公意見之偏已如是又有談道著書百世
皆宗堪稱頂天立地大有裨於聖教者觀其評論偏

之尤甚如王安石引用姦邪傾覆宗社元惡大憝也
列在名臣錄稱其道德文章夫文章可也焉有引用
姦邪而可名道德耶蘇東坡諡文忠以其文章忠義
古今所共仰也乃極詆之謂得行其志其旤甚於安
石以安石之姦則未減其已著之罪以文忠之賢則
巧索其未形之敝不特此也秦檜之姦人皆欲食其
肉者也乃稱其有骨力岳忠武之死人盡爲垂涕者
也乃譏之爲橫漢儒董賈之流皆議其疵匡衡之言
頗純粹無疵則云匡衡好懷挾其不成人之美如此

以至諸葛忠武侯則名其爲申韓陶靖節則譏其爲莊老古名賢竟有如此而今之人有誰敢妄逞胸臆如是之偏者乎冬烘默然而退

反切

今塾中子弟讀書識字必先將反切講究爲要如國書竝無四聲而有反切十二字頭後合字皆反切也否則一入館選習清書不易通曉不知反切上取字母下合本韻隨口念出卽得之矣如柰卽爲桑桑落爲索不可爲叵者乎爲諸至於市井鄙談亦有反

雕談初筆卷六

三

遼東日本
避史手校本

切人皆習而不知如突圍爲團窟壘爲孔蝦弓爲兕窟羅爲窠瓜郎爲光如此等類不可枚舉

書家祖師

何子貞太史書法爲當代冠軍海內其仰余嘗聞其言云書家之祖師今人知者極寡劉景升也鍾繇胡昭皆其弟子昭肥繇瘦各得一體耳案景升遺蹟絕無存者秋文志有劉表集亦久亡矣偶讀三國志表與袁尙兄弟書其筆力不減崔蔡之流而表初爲黨人在八及之列其文行如此宜乎書法之工爲祖師

也朱枚厂孝廉詮亦工八法一日晤言及之悅甚以爲聞所未聞

浦珠兒

珠兒姓浦產自邗江長於金陵早落教坊赭寇時轉徙暫羈春申江年方二八色藝俱佳其心敏性傲苟非相賞者不之見也平生與湘鄉左公子孟辛密一日有疾思食馬板腸公子卽殺所蓄坐騎以啗之公子於中秋設讌招余翫月珠兒亦在座側余曰今宵不須吹唱只許清談第恐珠兒喉癢珠兒曰每有俗

客可鄙之至必欲高唱媒褻淫詞而不知動人處不
必詞句全在曼聲搖曳作態今夕幸遇知音默默了
之終覺彼此有負請君兩人各製小詞儂將別加字
樣低聲一試一則免奴喉癢二來不孤負此嫦娥耳
余應之口占曰今夕偕看月一輪清光未許染纖塵
尊前皓齒明眸客偏媚忌情鐵石人公子以爲有此
佳句不須作矣卽促珠兒任意一唱於是珠兒卽將
此詞緩緩唱來聆其詞中忽加呀巴呀吽兒呀吽兒
倚兒呀之類便不覺余詞之麤笨第出經樓口加此

幾箇字頓令人魄醉魂消矣此卽所謂多哇則鄭耳

尾大不掉

尾大不掉皆以爲喻言非也案西域記有獸曰羯尾大於身之半非以車載則不可行元白湛淵有咏羯詩曰羯尾大如斛堅車載不起此以不掉滅彼以不掉死

蠮可療目

孟子所載陳仲子井上食李事嘗疑蠮可以治耳目之病及閱晉書盛彥之母失明年久嘗撻其婢婢以

炙螬啖之母食之美後以示彥彥乃抱母痛哭然母
從此兩目復明又當塗民邵堅厚業合章事母孝母
病瞽日傭歸必買市食以奉母一日邵出其妻得螬
螬蟲數十枚炙以奉姑給曰所親佳餽也姑食而美
乃畱二三啖其子子見之失聲痛哭母被驚雙目忽
開明如曩日邵欲逐其妻母止之曰此非婦之毒我
我目當再明天使婦以此醫我也邵乃畱之終身偶
閱本草亦云螬螬汁滴目中可去障翳乃知仲子匍
匐三咽不爲無謂

命同人異

湘陰吳偉才左恪靖侯三姑母次子也與左侯同以
嘉慶十七年十月初七日寅時生所居相距八里許
當日兩家報喜者相遇於道中之玉石橋其八字則
壬申辛亥丙午庚寅也少與侯竝有奇童之目至道
光壬辰侯與其兄景橋中書君同舉於鄉而偉才已
改業屠豕矣侯督浙閩時偉才嘗一至閩侯勲績爛
然所殺賊以千萬計而偉才祿命中之殺刃僅用之
於屠豕何也如昔文潞公之同命者僅得與之同席

而食數十日與此事皆屬可解而不可解者況大小
戊子雌雄甲辰又何足云乎偉才好大言嘗曰太公
隱屠沽余獨不然乎今尙健在雖不在屠肆而親舊
歲時用牲或召之輒欣然鼓刀而往卽他日果如太
公望之遇而以前與左侯已大不符矣近有長洲王
紫詮廣文戊子生與一奔走江湖之日者年月日時
無一不同廣文博古通今著作充棟已風行四海胸
羅數千卷足涉數萬里中外知名士也而日者僅識
之無卑鄙異常不時飢餒僅借文墨之名以糊口卽

此兩命雖同而亦迥然大異耳自是不敢輕言命理矣

婦有七出三不去者

凡婦不順舅姑一也無子二也淫三也妒四也有惡疾五也多言六也竊盜七也有所取無所歸不去與更三年喪不去前貧賤後富貴不去余以爲七條中惟無子卽行出之未免太甚當必兼犯六條中之病可也否則如賢而無子或櫻暗疾疾可醫藥而念未必終身無子且賢者能主中饋司蘋蘩卽不生育亦

可取妾生子況賢則必不生妒按先儒嘗有疑以不專爲主婦而設如妾則專爲生子而取苟仍無子出之或再取也此說近是

鹿尾

壬戌仲冬一日余以事至洋行適總管林秋崖安排燕會於是堅畱作不速之客肴核豐腆無非海錯山珍至中閒林自呈銀槃一品座客曰是鹿尾乃都中託人向御膳房所購烹熟者今晨輪船剛到殊屬湊巧想君必以食指動而來也其啖之時客問余曰君

能以此味出處一言乎余對曰 朝廷御膳以鹿尾
爲珍品常以之賜大臣案之古書不甚著惟憶梁劉
孝儀曰鄴中鹿尾爲酒肴之最時魏使崔劼在坐曰
生魚熊掌孟子所稱雞跖猩脣呂氏所尙鹿尾乃有
奇味竟不載書籍每用爲怪云云然則六朝已貴此
味矣

王廣文異夢

王紫詮廣文自言爲崇安寺僧轉世屢夢至其地究
不知寺在何處廣文行居四上有三兄十日閒以痘

殤雲亭明經師乃禱於武林遂得廣文少多病九歲
授以大悲呪一遍卽能背誦不遺一字夢時魂從泥
丸宮出嘗造一蘭若僧人數百皆披袈裟執經卷諷
誦甚苦見廣文至絕不爲禮法事旣畢各歸房中有
一房雙扉虛掩窺之闌無人焉旁立童子謂之曰欲
來卽入不來盍游東舍導之至一所內皆妖冶女子
粉白黛綠翠袖紅裙不可勝數見廣文至羣手招之
廣文自思此或不可入轉身欲退遽然竟醒髻影衣
香髣髴猶在尙記額曰秦津因述之於余余亦不解

方軍門將才

紫詮廣文以壬戌避亂至粵音問久絕已所往游日本道經滬上筆札始通爲言在粵結文字交者固不乏人而所見將才莫如方照軒軍門麾下所統多潮郡人勇悍善戰至死不撓衝鋒陷陳折銳摧堅所至獨先軍門尤能與士卒同甘苦嘗於閩粵之交身經數百戰從未挫北緒寇汪海洋踞惠州其勢甚銳軍門猝與之遇以數千人擊其十餘萬眾自旦至暮氣愈猛鬪愈力汪逆不支遂奔是役也左侯相知之歎

獎不置軍門之功名因此以顯軍門賞罰嚴明餉或不繼則出已貲畀之將士有功立予獎賚不少延不待請之於上也所以尤能得其死力在任設防堵置斥堠築礮臺備器械往戡毀家以紓難急公奉上如軍門者近今所罕矣廣文爲余緬述如此余亟浮一大白如軍門者真將才哉

羅浮蜨繭

道光年間歿叔江君客游歸里以繭兩枚見貽云此乃羅浮山蜨不易得者昨友從嶺南來得此贈余余

今分贈第防其蠹化卽去任藏諸筍篋局鐫封固無
有不能飛逸者余乃置諸大玻璃餅中仍用玻璃塞
蓋之并鎔蠟固口日日眎之全無動靜閱半月忽見
兩繭俱破中蛹變而未蛻其色五采奪目次日再眎
仍未蛻成而蛹已較大數倍矣於時適以事出門三
日返家急眎之竝無生動栩栩之態值菊生浚來齋
閒語菊生弢叔弟也因言及此菊生索觀余卽出示
菊生云如此餅中氣息不通豈能蛻而化耶此蛹已
似殭蠶君勿望其成蜚如果成蜚眞仙乎仙乎余曰

盞傾出一觀何如卽將餅口封蠟剥去揭起塞子陡覺餅中冷然一陣清風隨蓋而出風中如彩雲湧出兩朶騰空飛翔棟梁間余與菊生瞠然呆眎良久忽從窗隙逝竟杳不知其所之矣蜚大如蒲筴身翅有光色難描寫然人稱其仙余謂之機苟菊生不以爲已死其機心亦徒施爾如預知有菊生而故設機心以待殆亦仙歟王雲亭明經師聞之曰是非機也仙也假使在餅中一年不敗不死十年不敗亦不死一旦啟之踴躍而去仙界歲月本與塵世四季不同今

此仙蜨宛如跳在壺中磕睡豈計以時日而醒哉

屏盜賊呪

退庵隨筆載屏盜賊呪言無論居家行路每日黎明時獨起向北竝足而立吸氣一口隨噓出默念七七四十九盜賊滿街走伽藍把住門到處不著手童七童七柰若何如此念七遍或九遍可以免患凡行旅投宿店此法亦可試惟須避人見耳余以爲貪浬之輩雖日念之果能辟去盜賊然恐悖入悖出之理當亦必有勝於遇盜賊之一劫爾

三焦

一週長子叔本

方書載十二經之脈其手少陽爲三焦者人莫能指其定處或謂三焦蓋男子藏精之處爲腎臟之外府腎賦形有二故膀胱三焦分爲其府卽命門之關鍵也有被礫刑者見其膀胱後別有白膜包裹精液此卽三焦之謂也余以爲此說似屬不謬否則致使十二經之名頓缺其一未識時下醫家爲然乎否

搭截題

顧滌盦帥偶述父執郭頻伽先生曾云某司空督學

中州時好出搭題以防勦襲之弊致經文多割裂法
時帆祭酒式善心惡其行後某復督學楚中往辭法
公公多所獎譽某心喜悅臨行公送至中庭曰楚中
有一故交代爲諉誣可乎某詢其姓氏法公曰孔孟
二夫子著述已千百載請君慎勿將其文再行割裂
也聞者無不撫掌

戚孀子

余避兵氛僑寓如皋有一任生淞東名士也萍遇於
酒樓詞氣嫺雅風度翩翩敘話半晌知其詩古文詞

書畫金石無一不精性情與余頗洽各相見恨晚遂訂交焉時相往來一日酒半酣把醖欵獻不言者再余訪詢之曰某有一事非素心人不可告也某年郊行遇雨投宿田家有一老媪啟扉迎入殺雞爲黍意殊殷勤瞥見後軒坐一麗人不施朱粉而丰姿絕世遙望之宛如瑤島仙姬心甚驚異卽詰媪曰彼美何人也曰是月前夜半奔來者郎欲識其顛末當自叩問卽聞媪呼曰戚孀子今夕我有嘉賓汝盍出相對一語以定日後計良久始出見曰妾遭家不造疊遇

寇難屢經覓死不幸猶延殘喘昨途中又遇土匪散
失無依流落於此誓將遁入空門以懺夙生之愆某
遂細詢由來得悉里第姓氏被難情狀某奔走四方
花天酒地閱歷深矣於眾香國裏從未得覩如戚孀
子之美且豔者當對語時聆其悲哀之音宛似雛鶯
聲澀又若流泉韻咽而顧盼閒情殷欲溢任使泥裝
木刻鐵肺銅腸見之亦必生憐況如我輩之鍾情者
乎然惟憐之愈深愈不敢稍萌一犯之之心卻又兩
意相符戚實處子也某已有室矣遂在言表訂結再

生緣某於媼家小住旬日臨別各揮涕賦詩贈答不
勝依戀之私別後年餘再造媼家探戚孀子消息則
已返瓊樓矣媼曰自與郎君一見去後漸至寢食俱
廢形容清削奄奄半載瀕危唯口呼郎君之名含淚
而死今尙厝於後園芙蓉花下某於斯時痛若剗心
哭不成聲遂具隻雞孟飯設奠於花前一拜一哭口
占祭文曰烏乎戚卿卿何多情烏乎戚卿卿情致命
烏乎戚卿卿心我傾烏乎戚卿卿骨我刑烏乎戚卿
卿之慧心振觸不禁烏乎戚卿卿能守貞隕越不行

烏乎戚卿卿非我并甯死不存烏乎戚卿卿知室人
願結來生烏乎戚卿烏乎戚卿我誓心僧以答戚卿
焚香再拜以陳冀夢魂之相親毋獨岑寂於九京哀
哉尙饗自此一祭無從再去展拜芳骸每念及之未
嘗不黯然魂銷茲承下詢敢不寔白敬求何策以廣
之言訖涕泗沕沕余曰無傷也此乃文人之通病然
如君與戚孀子庶幾堪稱好色而不淫多情而不狎
眞才子也佳人也君子也淑媛也今生旣遇且結來
生生死不渝定當如願旋任生來告別爲之黔中從

戎欲殺賊立功將戚孀子貞行白於

朝以請旌表先了此生相感之情然任生從此一別
杳無音耗余每憶邇來輕薄少年詡詡然自以爲多
情而到處無不苟合余曰是皆但知淫而未識何者
爲情耳夫蠢動之物本不知情而無不知淫人若誤
以淫爲情也淫之至則聚麀亂倫與獸行何異此皆
任戚之罪人也

筮夢

嘗聞句容筮巡按重光未第時夢其父曰汝功名在

朝天宮某道士身上覺而信之訪其人訂交焉既而
辛卯金陵填榜卽道士也試官拆卷至簞名方訝其
姓欲易之而道士聞唱時已直書其姓名矣遂得不
易余以爲此夢乃趾離故意借簞弄巧實欲揶揄一
切希圖徼倖之輩否則士子窮達有命況簞之功名
不終於此

畫貓辟鼠

凡於危危日畫貓隨處張挂可以辟鼠說載東坡畫
跋余於白蓮禪院正衡上人臥室壁上見其年年手

畫一頭據云鼠輩終歲絕跡余亦將試之

古詩平仄

古詩有自然之天籟卻有一定之音節今人作古詩謂上下聯平仄可以不拘不知詩者也趙秋谷聲調譜旁圈平仄未免固陋善作詩者雖無庸拘泥秋谷之言然爲初學者舉以一隅自不至徇規矩而孟浪也

屐

浣紗石女詩一雙金齒屐兩足白如霜古時無纏足

赤腳著屐故見其白如霜也今之粵女猶如此吳宮
有響屧廊以梗梓板藉地西子行則有聲如今之木
底鞋故名響屧今越諸暨男女多著木屐不分晴雨
猶西子遺製也梁詩畫屐重高牆當是闊頰屐繪以
五采也余憶三十年前曾見士夫家有一閨閣子以
屐變體爲舄底用香樟木高寸許中雕空僅畱下面
一片更鑿花朵孔孔上實以香屑屐屐以方目紗佈
底行則香屑滿於地上印成花朵宛然步步生金蓮
矣可謂窮奢極侈未幾卽返瑤臺宜其鳩爪之不若

也

喪丐

海藏禪院前明族祖元佑公之梅花墅也後捨宅爲寺今失於修葺頽廢幾半殿廡下常爲乞丐所借宿有一丐事母至孝日中市行乞歸必沽酒買脯以侍奉居然怡怡色養至母病死呼號三日竭力掩葬仍乞於市歸於廡下每飯必祭已歷兩載未嘗稍懈一日里中演劇有一屠豕者厭其求乞曰爾今日當隨我戲場去既可多索錢又好看齣戲爾何呆耶丐

曰我母喪未終看戲取樂於心不安屠者曰我生意
小人反不知此理得聞爾言於心亦戚戚焉我母服
未滿亦不去矣適有一士人路過聞之曰汝等皆癡
者乎我乃名列膠庠身通六藝現丁內艱一週未到
尙將去看況汝一屠者乎況汝一餓丐乎逕至戲場
見一富翁以貲捐職俟服闋到省者在小臺望見士
子手招上臺坐於翁側士將屠丐一節言及之曰某
始嗤屠丐爲癡旣而思之是或一道也翁乃譁然曰
卑卑屠丐烏足道哉子不聞諺乎千準萬是百不錯

況取法乎上僅得其中吾乃有職人員猶且在此子
一寒士有何妨乎況日前在郡中戲館目擊一鄉先
生素服高坐正席與客同觀先生乃掇巍科入翰苑
典試督學現以丁憂在籍皇然觀劇是則吾與子當
尤而效之何子之不向上哉翻以屠丐之言心有感
動誠恐於心則無媿而境遇必將流入屠丐也慎之
慎之有客於看臺邊歷歷聞之將此一番備述余前
余愀然曰世道淪亾風俗日偷未知伊于胡底正如
人飲狂井之泉必以不狂爲狂也

釣臺絕唱

每見題巖子陵之作佳者不勝枚舉終未能道出子陵心窩裏事惟方正學一絕亦宛轉亦顯豁可謂發千古之隱矣詩曰糟糠之妻尙如此貧賤之交可知矣羊裘老子蚤見幾故向桐江釣煙水蓋光武中興令主也而廢郭后及太子疆後世頗爲口實當日子陵能不動心乎

畫家三要

畫家一要人品高二要師法古三要寄興遠然後至

工夫純熟則兔起鶻落足以赴之不然則兔背而馳
鶻墮而死心畫自佳耳其如手畫何是以院人畫有
七分好處只有三分神氣名士畫有三分好處便有
七分神氣故書之精液皆畫之脂膏杜詩云讀破萬
卷書下筆如有神洵不虛也近有蕭山任薰之工夫
純熟矣所云三要亦不相背而惟胸少五車書究屬
畫家之畫雖可傳後尙非神品良可惜也

姚桂

姚桂字季根顧穎箬太老師之侍史也暇則手不釋

卷頗善吟咏有詠柳絮云東西南北渾無定慣上香
車撲繡衣詠雙蝶云因風相逐情何限能惹深閨一
段愁詠紅葉云幾番夢想桃花漲流入宮牆好代箋
詩如其人故影事極多

生造日

日月蝕而私者生兒多成怪形輕則終身疾病日月
晦朔弦望而私者生兒則愚癡瘡癰鉤絞了戾遂障
而私者生兒多兇暴無禮亦猶木日造麴而酸水日
造醬則生蟲九焦日種穀則不生芽六合日遣鬼鬼

不去火日安蜂則蜜苦土日種麻則不生人若畱心
試驗則無一不應其所以然者感而已矣

荆釵傳奇

余在郡中元夕無事友人拉至茗寮聽評語客甚夥
隔座有三人皆皮冠褐裘侈談傳奇不經之事余聞
而蹙然曰誣甚友請詳言余曰玉梅者乃王梅谿先
生之女也孫汝權宋進士與梅谿爲友敦尙古誼先
生劾浩八罪汝權實愆戇之史氏最切齒遂作荆釵
傳奇謬其事以讎之當道宜禁唱并毀其書

銀蓮金羸

四明巨商楊某貿易滬上以洋貨起家富甲東南時
當軍需孔亟鉅公往往與之商貸以是勢燄衝霄漢
嘗有一官弁執香長跽門首三日求其代向上游緩
頰請免罪案則其要結當路炙手薰灼可知平日起
居飲食器用服御之侈亦可想見其家所藏竟有出
人意表之物余所目擊者嘗折簡來招訂期邀飲余
訝素昧平生詢諸來人方知特請五客欲將所購書
畫骨董一一質之以定品評屆期肩輿來返至則已

到兩客一爲金陵馬大年處士驥一卽同邑嚴起雲
明經承健無何又至陽湖趙霞標上舍赤城番禺林
錫九中翰昌齡早有門客陳生陪坐旋見楊君恭服
出拜略敘寒溫遂把卮各敬一巡卽倩陳生陪飲而
入有侍史五六輩陸續捧出卷軸鼎彝金石硯瓦甃
玉等羅陳於前堆几盈案陳生卽請吾儕加以賞鑑
余竊思識見譾淺何敢妄評惟於六法稍知萬一而
孰知倩余只辨別畫而已書則起雲牌板則大年鼎
彝之屬則錫九甃玉硯瓦則霞標也余不得已於數

十種中擇其四一鄭所南蘭花冊子十二幅一金冬
心無量壽佛像小立軸一羅兩峯鬼趣圖十六幀一
陳洪綬芭蕉雞冠花小橫披餘悉膺本馬嚴諸君亦
各有去取事畢撤飲偕步中庭庭有兩座紫檀架架
上供青地粉白雲龍簃盎兩口圍約四五尺許盎植
四色蓮花各四朵葉七八莖修短不齊花葉亭亭光
耀奪目風吹之鏗鏘有聲音韻欲流細視之蓮之花
葉乃朱提之骨鑄而鏤成之色則設五色藍石耳清
水之下寸許五色石子滿貯盎底瑩然如錦水面各

有金羸兩三箇居然放麝噴水蛭於盎口諦審之殼
則赤金鎔成也同人無不異之後不數年楊病卒眷
屬歸鄉嫡庶爭產致訟家貲頓落想此兩盎中物安
得無恙耶

洛成

釵小志麗居孫亮寵姬也鬢髮香淨光滑潤澤望之
如綠雲之初出秦岫旣無垢膩可除亦不謝故生新
一生未嘗試用洛成案洛成乃梳篋別名也

陽湖婦訣別詩

庚申吾吳失守余奉親挈妻孥避氛之滬路經閔巷
鎮泊舟過宿聞鄰舟有男子哭聲甚哀詢之亦逃難
者一陽湖貧諸生也其妻病歿於舟次有與夫訣別
詩一絕云當年二八到君家詎料兵戈亂似麻此後
叮嚀無別語免教兒女衣蘆花悽惋不堪卒讀

釋鰥有子

理若可憑而有時竟不能憑事所必無而有時確鑿
有之其有之也卽有可憑也特人之所值有幸有不
幸耳同邑殷子敬少尉福熙余季女弟之夫也少攻

帖括後能詩清風亭詩社常與焉中歲乏嗣一日大風園垣遽圯命工修築牆腳掘一殘碑刊放生二大字碑陰文字漫漶難辨初生櫻肝陽疾旋患喉痺自得此碑心有所感將魚鼈禽鳥日買放生猶不自慊拉友朋親串輩併力從事作放生會不敢一日稍懈五六年閒死而得生者不知凡幾病漸瘳忽遇一道士於周行問曰子有何善睂閒生陰隲紋生曰無之曰惜乎子相於言語時首必振動主無子今可得一子而壽恐仍不永耳然五年前一大厄已過矣此後

勉旃由是放生益力一日漁人捉鰕魚一筐來購而
貯諸盎中以待明日放於吳淞江夜夢一老翁揖而
謝曰老夫待罪於東海有年矣今有一媵子頑幼無
知誤入漁網幸遇吾子明晨俟於澄河南岸勿遲未
識吾子生平亦有所不足乎曰尙乏嗣息曰易耳期
以三載爲報惟大限難違誠恐得子後卽不利於君
身耳遂驚寤坐以待旦細觀盎中果有一頭似鰕非
鰕倏大倏小卽命舟之澄河投鰕南岸是日東南風
大作蘆葦獵獵霎時波平如掌水明如鑑岸旁有金

鱗無數似待鰾入水至是齊向船首一湧而逝來歲
冬閒果得一子乳名堪生孱弱難育至四齡病將不
起生憂患交加遂發舊疾更增欬嗆不三月溘逝子
卻漸次安康若有轉移之象此殆所謂大限難逃歟
然則相可憑乎究以作事爲主世閒無事不可潛移
默運終毋視爲偶然也

除巨猾

潮郡沙龍鄉鄭姓族大人眾有鄭二者擁貲鉅萬田
連阡陌借防盜賊爲名鎗礮藥彈無不具始猶要結

官長繼勢燄愈張遂爲其所挾制宰官至任必先往拜否則把持一鄉租賦無所輸聚黨數千人官之左右皆其羽翼性極凶悍睚眦小怨輒置之死每殺人悉剝裁土中前後所殺無算同族孝廉爲主事者亦居是鄉偶出外田爲其所佔歸不敢較一夕遁去走京師告變上密諭督撫除之制軍因與方照軒軍門商軍門曰是當以謀致外佯與結歡而內爲之備以公事招之至郡下之獄潛遣壯士搗其鄉悉就縛家中違禁物甚夥其子鄭森尤桀黠相濟爲惡先一

年卒或曰若其子尙在未易猝除也軍門不動聲色
而使神姦巨慝束手就戮於頃刻閒韜略不亦神哉
附注韜聞鄭二陰有襲蹕潮郡意鄉人直以沙龍王
呼之稱其子曰太子森好事者播爲竹枝詞旣除人
快心大

珊瑚舌雕談初筆卷六終